



DR. MAHATHIR Mohamad menerima sumbangan cek bernilai RM88,888.88 daripada Datuk Ghazi Sheikh Ramli sambil diperhatikan oleh Syed Razak Syed Zain (kanan) pada majlis peletakan batu asas bangunan Dewan Perhimpunan Melayu Kedah di Alor Star, semalam.

um - 29/4/2004, m/s: 8

Golongan akademik usah bertengkar — Dr. M

ALOR STAR 28 April — Bekas Perdana Menteri, Tun Dr. Mahathir Mohamad meminta golongan akademik tidak perlu bertengkar sesama sendiri sebaliknya membuat kajian mendalam sama ada bahasa Melayu yang dipertuturkan sekarang tulen atau rojak.

Beliau berkata, kajian itu penting supaya orang Melayu dapat mengekalkan budaya dan kesenian yang mereka warisi.

“Saya dapati mereka yang berdebat mengenai soal bahasa ini sebenarnya tidak membuat kajian mendalam,” katanya.

Beliau menyatakan demikian ketika berucap pada majlis peletakan batu asas bangunan Dewan Perhimpunan Melayu Kedah (DP-MK), Lebuhraya Darulaman, di sini hari ini.

Muka depan *Utusan Malaysia* hari ini melaporkan penggunaan bahasa Melayu kini semakin luntur disebabkan sikap tidak peka masyarakat yang merosakkannya dengan menggunakan bahasa rojak.

Menteri Kesenian, Kebudayaan dan Warisan, Datuk Seri Dr. Rais Yatim dilaporkan berkata, golongan ini tidak sedar mengenai kedudu-

kan bahasa Melayu sebagai bahasa kebangsaan yang dilindungi di bawah Perlembagaan Negara.

Menurut Dr. Mahathir, mereka yang membincangkan perkara itu tidak menghalusi sebab-sebabnya ataupun keadaan bahasa Melayu itu sendiri.

Katanya, soal bahasa, budaya dan ketuanan Melayu boleh dibincangkan dengan fikiran yang waras, ilmiah dan dengan ilmu pengetahuan, bukannya mengikut emosi.

“Kita harus tumpukan kepada perkara-perkara yang melibatkan semua orang Melayu untuk mencari penyelesaian terbaik,” katanya.

Menurutnya, orang Melayu kini tidak lagi dipencilkan oleh dunia tetapi menjadi sebahagian daripada warga yang sedang melalui proses globalisasi.

“Sekarang ini kita bercajak mengenai bahasa rojak dan ini menjadi satu isu yang besar dan kita tidak mahu melihat bahasa kita menjadi bahasa rojak,” ujarnya.

Beliau berpendapat, langka yang wajar ialah membuat kajian secara ilmiah mengenai bahasa Melayu

untuk mengetahui apakah bahasa itu sudah menjadi rojak atau tidak dengan mengambil kira perkataan-perkataan yang dipinjam daripada bahasa lain sejak dulu kala lagi.

Katanya, jika kajian dibuat, orang Melayu akan tahu yang mana satu perkataan yang betul-betul Melayu dan yang mana tidak.

Beliau memberi contoh, orang Islam di negara ini kebanyakan menggunakan nama yang dipinjam daripada bahasa Arab seperti Ahmad, Hussein dan Ali sedangkan nama Melayu sebenarnya ialah Awang, Itam dan Puteh.

“Saya juga tidak tahu nama saya dari bahasa Arab ataupun tidak, orang Syria kata nama saya bermakna ‘bukan main megah lagi’ dan orang India pun kata macam tu juga, perkataan maha (Mahathir) bermakna besar dan perkataan maha bukannya perkataan Melayu,” katanya.

Apa yang jelas, katanya, perbendaharaan kata bahasa Melayu sebenarnya amat terhad dan tidak mencukupi untuk menangani masalah perkembangan dunia moden ini.